

Prezident xotin-qizlarni bayram bilan muborakbod etdi



Toshkentdagi Xalqaro kongress markazida 8-mart – Xalqaro xotin-qizlar kuniga bag'ishlangan bayram tadbiri bo'lib o'tmoqda.

Bayramda O'zbekiston Respublikasi Prezidenti Shavkat Mirziyoev ishtirok etmoqda.

Tadbir avvalida davlatimiz rahbari xotin-qizlarni ushbu ayyom bilan tabriklab, ularga mehri, ehtiromini izhor etdi.

- Sizlar biz uchun avvalo muqaddas ona, aziz Vatan, oila timsoli, bitmas-tuganmas mehr, ezgulik va kuchg'ayrat manbaidirsiz, – dedi Shavkat Mirziyoev.

Prezident xotin-qizlarning barcha sohalardagi faolligi, ayniqsa, pandemiya sharoitida aholi salomatligini asrash va bolalarni o'qitishdagi fidoyiligini alohida ta'kidladi.

Bugungi kunda mamlakatimizda mehnat bilan band aholining 45 foizini xotin-qizlar tashkil etadi. Boshqaruv tizimida ularning ulushi 33 foizga yetdi. Bir yarim mingga yaqin ayollar rahbarlik lavozimlarida ishlamoqda. Bu boradagi salohiyatni yanada oshirish maqsadida 6 mingdan ziyod faol xotin-qizlardan iborat kadrlar zaxirasi shakllantirilgani qayd etildi.

Davlatimiz rahbari 6 ta tumanda ayollar hokim vazifasida ishlayotganini ta'kidlab, ularni olqishladi.

Ayollarning huquq va manfaatlarini ta'minlash, ularga ko'maklashish bo'yicha eng quiy bo'g'in – mahalla va xonadongacha kirib boradigan vertikal tizim yaratilmoqda. Keyingi uch oyda ijtimoiy himoyaga muhtoj 80 ming nafar xotin-qizning muammolari hal etildi, 32 ming nafari ish bilan ta'minlandi.

Oilaviy tadbirkorlikni rivojlantirish uchun qariyb 215 ming oilaga 6 trillion so'mdan ziyod kredit mablag'lari ajratildi. Uy-joy sotib olish uchun 1 ming 250 nafar xotin-qizlarga salkam 22 milliard so'mlik boshlang'ich badallar to'lab berildi.

Prezidentimiz ayollarni moddiy, ijtimoiy qo'llab-quvvatlash bo'yicha bugun yana bir qarorni imzolaganini ma'lum qildi. Unga ko'ra, joriy yilda turmush sharoiti og'ir ayollar hamda yolg'iz onasi qaramog'ida o'sgan qizlarni uy bilan ta'minlash maqsadida byudjetdan 210 milliard so'm, boshpanasi bo'Imaganlarni ijtimoiy turar joylar bilan qamrab olish uchun yana 211 milliard so'm yo'naltirilishi aytildi. Shuningdek, muhtoj xotin-qizlarga moddiy yordam berish, ularni davolatish, kasb-hunarga o'qitish, ish bilan ta'minlash uchun ham katta mablag'lar ajratiladi.

Davlat rahbarining nutqi xalqimizga, ayniqsa, yosh yigit-qizlarga murojaat, da'vat ham bo'ldi.

- Oila - mehr va baxt qo'rg'oni. Oila bor ekan, farzand degan beba ho ne'mat bor, insoniy qadr-qimmat va ma'naviyat bor. Oilaviy baxt bu – eng ulug' saodatdir. Mashhur qo'shiqlardan birida aytiganidek, "Uyida baxti borlar har yerda baxtiyordir". Men aziz yigit-qizlarimizga murojaat qilib aytmoqchiman: turmush qurishga, oilaga, farzand taqdiriga nihoyatda chuqur mas'uliyat bilan qarang. Bu masalaga yuzaki yondashib, ham o'zingiz, ham o'zga bir inson hayotini xavf ostiga qo'y mang", – deya ta'kidladi Shavkat Mirziyoev.

Bu borada ko'pni ko'rgan mahalla faollari, muhtaram nuroniylar va yoshlarga katta ishonch bildirildi.

Ma'lumki, shu yil 22-fevral' kuni davlatimiz rahbari Birlashgan Millatlar Tashkilotining Inson huquqlari bo'yicha kengashi sessiyasida nutq so'zlab, ijtimoiy-siyosiy hayotda va tadbirkorlik sohasida ayollarning rolini tubdan oshirishga qaratilgan ishlar qat'iy davom ettirilishini ta'kidlagan edi.

Bayram tadbirida Prezident shu boradagi vazifalarni birgalikda amalga oshirish masalalariga to'xtalib o'tdi. Qizlar tarbiyasi, ularni mustaqil hayotga tayyorlash, zamonaviy bilim va hunarlarni egallashi, ish joyiga ega bo'lishi, jamiyatda munosib o'rinn topishiga alohida ahamiyat berishimiz zarurligini ta'kidladi.





MATBUOT XIZMATI



Uzbek Respublikasi Prezidentining
MATBUOT XIZMATI



Manba

Uzbekiston Respublikasi Prezidentining
MATBUOT XIZMATI